



Bapolisi bakuti banozgeka kumalana na vivulupi



Baukirano bakukhumba maudindo



Ulendo wanguba bakunowa—Ba Kondowe

# 2025 ndi ifeyo

DEMOKALASE YAKUNOZGERA WALIYOSE | VOL 01 | NO 01

PACHISULO , 28 JUNI 2025

## BANTHU 14 NDIBO BAKUKHUMBA UPULEZIDENTI

### JB ni mama yekha uyo wazamukwimirira pa upulezidenti

BRIGHT KUMWENDA

**P**akufika mulenji wa mayiro, banthu 14 ndibo batola makalata kufuma ku wupu wa Malawi Electoral Commission (MEC) na chirato chakuti bazakaphalizgane pa chisola cha mrongozgi wa charo ichi.

Kweni ba Sangwani Mwafulirwa, muyowoyeli wa MEC, bakati unandi wa banthu bose abo batola makalata pa vitengo vyakupambanapambana uchari undamanyikwe.

Mrongozgi wa charo ichi ba Lazarus Chakwera uyoso ni mrongozgi wa chipani cha Malawi Congress Party (MCP) na ba Peter Mutharika ba chipani cha Democratic Progressive Party (DPP)



YARUTIRIRA | PEJI 3

Mtalimanja: Tasazgirapo madazi



CENTRE FOR CIVIL SOCIETY STRENGTHENING



Embassy of Iceland Lilongwe



Funded by the European Union

**Kurutiska pa nthazi muuso wa bamama, baukirano na banthu bakulimala m'Malawi**

# NDEMANGA

## Tikane vivulupi vikubwangandura muzi

N'chachitima chomene kuti apo visola vya pa 16 Seputembala vyaneng'enera vivulupi vichari kuchitika mu maboma yanandi ya charo ichi.

Kwa sono sono apa banthu banyake balikocha minibasi ya chipani cha Democratic Progressive Party (DPP) ku Mponela mu boma la Dowa.

Kweniso ku Ndirande mu musumba wa Blantyre, banthu bakachizga bamama kuvula vyakuvwala vya chipani cha Malawi Congress Party (MCP) nakubakhizga minibasi iyo bakakwera.

Vinthu nge ni ivi nivinandi chomene mu charo chithu. Malipoti yanyake yalikuperekeka ku polisi kweni yanyake yandafike.

Tikolererane chomene na mafumu na banthu ba ndyale abo bakuchenya banthu abo bakwambiska vivulupi.

Vivulupi ni vihene nakuti vikugongweska chomene bamama na banthu bakulimala abo bakukhumba kunjira ndyale.

Kwambura kulabiska munthu uyo wakwambiska, vivulupi ni vihene chomene chifukwa vikurwezgera kumanyuma ndyale za mu charo.

Malawi ni charo icho chikulondezga muuso wa demokalase. Kwantheura, tikwenera kumanya kuti mu boma la demokalase mukuba banthu ba vipani na maghanoghano ghakupambanapambana.

Nchakukondweska kuti mulala wa bapolisi ba Merlyne Yolamu baphalira bina Malawi kuti banozgekerera chomene kumarana na waliyose uyo wakwambiska vivulupi.

Bapolisi bakuti balabisiske chomene kuti pabe mutende panyengo ya kampeni, yakuvota na yakuphalazga vyakulondezga vya visola vya pa 16 Seputembala.

Ba Yolamu bayowoya makola chomene kwene tibarombe kuti bafiske ivyo baphalira banthu na bandyale pa chiphikiro cha Public Affairs Committee mu musumba wa Blantyre.

Tiwonge mawupu ya Oxfam na Women Legal Resource Centre (WOLREC) chifukwa chakubikapo zeru chomene kuti bamama patongepo lwandi pa ndyale.

Tose tikwenera kukana ndyale za vivulupi. Muzi ba vivulupi ukukhalira chara kubwanganduka!

**MNONZGI**

Phone: (+265) 888 20 90 27/0999 91 26 79

Email: brightkumwenda.npl@gmail.co

# Ungweru pa za Simatimatiki

LUCKY MKANDAWIRE

**P**ali mphambano pakati pa vipani vyakusuka boma na wupu wa Malawi Electoral Commission (MEC) chifukwa cha Simatimatiki.

Simatimatiki, kwakuyana na wapachitengo wa MEC ba Annabel Mtalimanja, ni makina yakulembeskerera banthu bakuvota, yakupokerera na kutumizgira mauthenga ya mavoti.

Simatimatiki ni mazgo gha Chizungu agho ghakung'anamula Smartmatic Election Management System (EMS).

Vipani vya kusuka boma vikuti boma likukhumba kuzakabira visola kwizira mu nthowa ya Simatimatiki kwene MEC yasuska ivi.

Mlembi wa chipani cha Democratic Progressive Party (DPP) ba Peter Mukhitho bakuti nkhwantha zilabiskeso makora kaundula wa mavoti pakuti Simatimatiki yili kugwiriskika nchito kwene MEC kwizira mwa muyowoyeli wake ba Sangwani Mwafulirwa yakana.

MEC yili kusintha



**Kondowe:** Tinange ndalama zinandi

dongosolo la visola yikati yalabirira visola vya charo cha South Africa ivyo Simatimatiki ikagwiriska nchito.

MEC yikachema balalabalala ba vipani vyose vya ndyale, mawupu na batolamakani nakubaphalira kuti yikukhumba kutola Simatimatiki nge ni nthowa yakwendeskerera visola.

MEC na vipani

vikazomerezgana nakuti balalabalala banyake bakaruta ku Zambia kukaona umo charo icho bakagwiriskira nchito Simatimatiki.

Banthe bese bakati bakhorwana Simatimatiki, MEC yakagula makina 6 500 nakuchema vipani vyose kuti vikapokerere makina ayo pa chibanja cha Kamuzu International Airport mu musumba wa Lilongwe.

K w e n e mwamabuchimabuchi, vipani vyakusuka boma vikavunduka nakuyakana makina ayo.

Vipani vyakusuka vikuti vyaro ivyo vili kugwiriska nchito Simatimatiki nge Kenya, Phillipines na Venezuela visola vyawo vikenda makora chara.

Wapachitengo wa MEC ba Annabel Mtalimanja bakuti ivyo vipani vyakusuka boma vikuyowoya vilije ukaboni.

Nanga wuli vipani vyakusuka boma vikukana Simatimatiki, MEC ikuti ikuwerera kunyuma chara.

Wapachitengo wa wupu wa Civil Society Elections Integrity Forum ba Benedicto Kondowe bakuti boma linange ndalama zinandi chomwene para MEC yatondeka kugwiriska nchito makina aya.

"Nthowa yiweme nja kuti vipani vya kusuka boma na MEC badumbirane nakumazga mphambano zawo," bayowoya nthura ba Kondowe.

Banthe na mawupu yanyake yazizwa na kusintha kwa maghanoghano kwa vipani vyakusuka boma.

## Mayi Chisankho



# Bapolisi bakuti banozgeka kumalana na vivulupi

KANDANI NGWIRA NA  
BRIGHT KUMWENDA

**B**apolisi bakuti banozgeka kuvikilira banthu mu maungano ya ndyale, pakuzakavota na pakuzakapharazga vyakulondezga vya visola cha pa 16 Seputembala.

Mulala wa polisi ba Merlyne Yolamu ndibo bakayowoya ivi pa ungano wa wupu wa Public Affairs Committee (PAC) mu musumba wa Blantyre.

“Napulika nakukhwaskika na madando ya bina Malawi chifukwa cha vivulupi ivyo vikuchitika m’maboma yanyake ya charo ichi.

“Ise nge bapolisi tikuyezga kuti tisange nthowa zakumazga vivulupi ivyo vili mu charo chithu,” bakayowoya nthura ba Yolamu.

Kubikirapo fundo, mulala wa wupu wa Centre for Democracy and Economic Development (CDEDI) ba Silvester Namiwa na wa Human Rights Defenders Coalition (HRDC) ba Gift Trapence bakachenya bapolisi kuti bakulekera dala kukaka banthu awo bakwambiska vivulupi mu maungano ya ndyale.

“Ise tikuona kuti bapolisi ndibo bakulekera dala kukaka banthu awo



**Yolamu:** Tanozgekera makora visola vya pa 16 Seputembala

bakambiska vivulupi ku Mponela na ku Ndirande nangawuli bakubamanya,” badidimizgapo ba Trapence.

Ba Mary Navicha, mulala wa bamama mu chipani cha Democratic Progressive Party (DPP), bakakolererana na ba Namiwa na ba Trapence.

“Ise tikuzizwa kuti chifukwa wuli bapolisi bandakake banthu abo badolola matayala ya galimoto za bimiriri wa ku Mphara ya Marango,” bakadandaula nthura ba Navicha.

Sono sono apa ku Ndirande mu musumba wa Blantyre banthu banyake

bakaphalira bamama ba chipani cha Malawi Congress Party (MCP) kuti bavule salu zachipani nakubakhizga minibasi igho bakakwera.

Nako ku Mponela mu boma la Dowa banthu banyake balikotcha minibasi ya chipani cha Democratic Progressive Party (DPP).

Pakuzgolapo madando agha, ba Yolamu bakati bapolisi bachali kufufuza kuti basange unenesko wenecho wa ivyo vili kuchitika.

Nanga wuli vivulupi vichari kurutirira, ba Yolamu bakuti bina Malawi bangopanga chara chifukwa bapolisi banozgeka kumalana na waliyose wakwambiska.

Mulala wa bapolisi uyu bakuti badumbirana na balalabalala ba vipani, mawupu na mipingo nachirato chakuti basange nthowa zakovwira kumazga vivulupi vya ndyale.

Mulala wa Oxfam ba Lingalireni Mihowa bakuti wupu wawo wadumbiskanapo na bapolisi za nthowa zinyake zakovwira kumazga vivulupi.

Ba Ethel Kachala, yumoza wa balalabalala ba wupu wa Federation of Persons with Disabilities in Malawi (FEDOMA), bakuti bamama na banthu bakulimala ndibo bakusuzgika chomene na vivulupi.

“Vivulupi vya ndale vikugongweska bamana na banthu wakulimala abo bakukhumba kujira ndyale,” bakayosoya nthura ba Kachala.

Papo wupu wa National Youth Council of Malawi ukaromba banthu ba ndyale kuti baleke kugwiriska nchito baukirano pa vivulupi.



**Mwafulirwa:** Tichari kumanya

## Barongozgi 14 bakukhumba upulezidenti

**YAFUMIRA | PEJI 1**

batola kale makalata ghabo.

Barongozgi banyake aboso batola makalata ghabo ni ba Joyce Banda ba chipani cha People’s Party, ba Atupele Muluzi ba United Democratic Front (UDF), ba Dalitso Kabambe ba UTM, ba Kamuzu Chibambo ba People’s Transformation Party, ba Frank Mwenifumbo ba National Development Party, ba David Mbewe ba Liberation for Economic Freedom Party, ba Kondwani Nankhumwa ba People’s Development Party na ba Kwame Bandawe ba chipani cha Anyamata, Atsikana, Amayi.

Ba Milward Tobias, baliska ba Hardwick Kaliya, Adil Chilungo na ba Smart Swira bazamukwimirira pabekha.

Kwa sono mama wachari yumoza—ba Joyce Banda.

Pakubikapo zeru, nkhwanthwa ya ndyale ya ku Malawi University of Business and Applied Sciences ba Chimwemwe Tsitsi bakuti palije chakuzizika pa ivyo vikuchitika mu charo ichi.

“Nanga kungaba ku vyaro vya bazungu, mbamama bachoko chomene abo bakuphalizgana na banalume pa visola vya mrongozgi wa charo,” yayowoya nthura nkhwanthwa iyi.

Ba Tsitsi bakuti mu boma la demokalase vitengo vikwambira mu vipani vya ndyale.

“Charo cha Malawi

AYAMBA KANDODO  
NA BRIGHT  
KUMWENDA

Mafumu ghachiska bamama, baukirano na banthu bakulimala kuti batolepo lwande pa visola vya pa 16 Seputembala.

Pakuyowoya na nyuzipepala gha 2025 Ndi Ifeyo, fumu Chowe ya mu boma la Mangochi yikati yirombenge mafumu ghachoko ghachoko ghose gha mu chigaba chake bovwire bamama, baukirano na banthu bakulimala abo bakukhumba kuzakamirira pa visola ivyo.

Ba Chowe bakayowoya ivi bakati bapulika kuti banthu banyake baktutuka ba Victoria Kingstone, abo ni mwimiriri wa ku Mphara ya Malango wa chigaba chapakati m’boma la Mangochi.

Ba Kingstone bakadandaula chomene pa ungano wa Centre for Civil Society Strengthening (CSS) ku Mangochi kuti banthu banyake bakubatuka chomene para

bana ungano m’boma ilo.

“Nkhalo yakuchita nkhaa na kutuka bamama ndiyo yikuwezgera kumanyuma bamana banandi abo bakukhumba kunjira ndyale,” bakadandaula nthura ba Kingstone.

Pakuyowoyapo, ba Chowe bakati nchachitima chomene kuti banthu banyake baktutuka nakuchitira nkhaa bamama.

Ibo bakati bamaranenge na waliyose uyo wakuchitira nkhaa bamama mu chigawa chabo.

“Nkhuromba mafumu yane yose kuti yabe maso chomene na banthu abo bakuchitira nkhaa bamama abo bazamwimirira pa visola vya pa 16 Seputembala,” bayowoya nthura ba Chowe.

Nabo bafumu ba Kachindamoto ba ku Dedza na ba Kameme ba ku Chitipa kakakolererana chomene na ba Chowe.

“Naphalira banthu ba mu chigaba chane kuti nkukhumba chara



**Kachindamoto:** Bamama bana wanangwa

kupulika kuti munthu munyake wanyoza na kusola bamama na banthu bakulimala abo bakukhumba kuzakaphalizgana nabo

pa visola vya pa 16 Seputembala,” bayowoya nthura ba Kachindamoto. Nabo ba Themba Mathemba

Chikulamayembe la m’boma la Rumphu lakuti bamama bana wanangwa wawimirira pa visola.

“Nkhukhumba chara kuti munthu munyake watimbanizge wanangwa wa ndyale wa bamama, baukirano na banthu bakulimala,” bayowoya nthura ba Themba.

Nabo ba fumu ba Jalavikuba ba ku mu Mzimba baromba bamama kuti bangopanga chara kutolapo lwande pa ndyale.

“Badada tikabapa mwabi kweni vili kubatonda sono iyi ni nyengo yakuti bamama bause,” bayowoya nthura ba Jalavikuba.

Nkhwanthwa gha ndyale ya ku Malawi University of Business and Applied Sciences (MUBAS) ba Chimwemwe Tsitsi baromba mafumu kuti yakolererane na vipani kuti bafiske vyakukhumba vya bamama pa ndyale.

Mphara gha Malango yina bimiriri 193 kweni bamama balimo 40 pera.

**YARUTIRIRA | PEJI 5**

# Bamama bapike mwabi pa ndyale

Mawupu gha Oxfam na Women and Legal Resource Centre (WOLREC) ghakovwira bamama, baikirano na banthu bakulimala abo bakukhumba kuzakaphalizgana pa visola vya pa 16 Seputembala. MACMILLAN MHONE wakachezga na mulala wa wupu wa Oxfam ba Lingalireni Mihowa kuti wapulike vinandi:

**Kasi ni nchito wuli zakukhwaskana na visola izo mawupu gha Oxfam na WOLREC yakugwira?**

Kwakuyana na dango la charo cha Malawi, bamama bana wanangwa bakufiska khumbo labo pa ndyale. Tina midauko yinandi igoho yikupereka nkhangono kwa bamama kutolapo lwande pa ndyale. Kwa vilimika vinandi, tachiska bamama kwizira mu kampeni gha 50:50 kuti batolepo lwande pa ndyale. Apo visola vya pa 16 Seputembala vyaneng'enera, tikuchiska bamama kuti bazakamirire pa vitengo vya makhansala na bimirira wa Mphala ya Malango.

**Longosolani makora, nchivichi icho mukukhumba kufiska kwizira mu nchito izi?**

Tikukhumba bamama banandi batolepo lwande pa ndyale nakuti bazakaphalizgane nawo pa vitengo vyakupambanapambana. Tikukhumba kufiska phangano la boma lakuti mwa bimiriri na makhabsa 100 abo basoleka, vitengo 35 vilute kwa bamama.

**Kasi mwabika dongosolo la mtundu wuli kuti mufiske chirato ichi?**

Mu chilimika cha 2023, ise ba Oxfam na banyithu ba WOLREC tikakumana na bamama nakuti bakatiphalira kuti bakukhumba tibape maluso gha ndyale. Bamama bakatiromba kuti bakukhumba kusambira maluso agha kufuma kwa nkhwantha za ndyale za mu charo ichi. Bakazunula ba Patricia Kaliati, Mary Navicha, Catherine Gotani-Hara, Esther Jolobala na ba Rachel Zulu kuti ndibo bakukhumba kuti babasambizge ndyale. Pa chifukwa ichi, tanozga masambiro gha bamama mu vigaba vyose vya charo ichi.

**Ni njani uyo wasange nduro na nchito zinu?**

Oxfam na WOLREC ikusambizga bamama abo bakukhumba

kuzakaphalizgana pa vitengo vya makhansala na bimiriri wa Mphala gha Malango.

**Kasi bamama basange chanduro wuli mu nchito zinu?**

Bamama bapokerenge maluso yakwendeskera ndyale. Tibamanyiskenge ivyo bakwenera kuzakachita para basoleka kuba makhansala na bimiriri ba Mphala gha Malango kulondezga visola vya pa 16 Seputembala. Bamama abo bazomerezgeka na wupu wa Malawi Electoral Commission (MEC) tizamukubapa katundu wakuchitira kampeni mu vigaba vyabo. Tikukhumba nge tingagwira nabo nchito kwa nyengo yitali.

**Nchivichi icho mukukhumba kuti bamama bachite kuti basange mwabi kufuma ku mawupu yino?**

Kwa sono, Oxfam na WOLREC bakuromba bamama bose kuti bajinthe mitima, bangawereranga kumanyuma chara. Tikukhumba basange maluso yakuchezga makora na b anthu ba muvigaba vyawo na kumanya vyakukhumba vyawo. Tikukhumba bamama bamanye dango la charo icho kweneso basange maluso ghapachanya gha mayowoyelo m'maungano. Dango la charo cha Malawi lili kusintha kwantheura tibasambizenge vose ivyo vikukhumbikira.

**Kasi ba Malawi Electoral Commission (MEC) mukukolererana nawu wuli?**

Tindambe nchito, tikakumana na balalabalala ba MEC na kubaphalira ivyo tikukhumba kufiska. MEC ikakhorwa nakutipa makalata

ghakutizomerezga kuchemeska vipikiro vya visola na kwendera malo yake gha nchito na yakuvotera. Tikakumanaso na wapachitengo wake ba Annabel Mtalimanja nakubaromba kuti bakhizgipo ndalama izo bamamama baperekenge ku wupu wawo. Bakatipulikira nakukhizga ndalama izo bamama bakupereke ku wupu wawo.

**Nchivichi ichi mawupu yino yafiskapo kwambira apo muli kwamba nchito?**

Tasambizga bamama bakufuma mu vigaba vyose vya charo chithu. Takumana na mafumu nakubaphalira kuti bachiska bamamama mu vigawa vyawo kuti

**Mihowa:**  
Tikukhumba bamama banandi pa visola vya pa 16

batolepo lwande pa chisola cha pa 16 Seputembala. Tachemeska vipikiro vyakupambanapambana na bamama, bapolisi, bamipingo na barongozgi ba vipani.

**Rwanda, South Africa, Namibia na vyaro vinyake ivyo vina bamama banandi bali mu ndyale. Kasi banyinthu bali kufiska wuli chirato ichi?**

Banyinthu bana vitengo ivyo bamama bekha bakuphalizgana pa visola. Nase tikwenera kughanaghana makora kuti tizakabe na

vitengo ivyo bamama bekha bazamuphalizgana mu vigaba vinyake vya charo chithu. Kumanyuma uku makani agha ghakafuma kwene ghakarutirira chara. Kwantheura, tichari kulondezga dango la visola ili lilipo.

**Ni masuzgo wuli awo bamama bakukumana nawo?**

Bamama bakukhumba maluso yakwendeskera ndyale, ndalama zamendero, kuchitiska vipikiro na kulipirira ku wupu wa Malawi Electoral Commission. Banthu banyake bakutuka, kuchitira nkha za na misinjira bamama para bana

viphikiro. Vivulupi vikugongoweska na kuwezgera kunyuma 50:50 kampeni. **Kasi**

**mukumarana navyo wuli?**

Tadumbiskanapo na vipani kuti tisange nthowa zakufiska wanangwa wa bamama pa ndyale. Vipani vikatipulikira nakuti vikakhwizga ndalama izo bamama bakeneranga kupereka mu visola vyawo vya chisanisani.

Tikakumanaso na balalabalala ba vipani vya ndale na mulala wa polisi ba Merlyne Yolamu na chirato chakuti tisange nthowa zakumazgira vivulupi vya ndyale.

Bamama banyake abo bakukhumba kuzaphalizgana bakalongosolera ba Yolamu masuzgo agho bakusangana nawo. Mulala wa polisi wakabasimikizgira kuti babikenge komiti yakuti yipengerere nthowa zakumazgira vivulupi ivyo vili mu charo ichi.

**Mazgu yinu ya umaliro**

Bamama 40 abo tikabasola nge bimiriri ba Mphara ya Malango bagwira nchito ikulu chomene mu charo chithu nakuti tikwenera kubawonga. Makhansala nayo yachita makora chomene nakuti banyake bakasoleka kuba ma meya ya misumba ya mu charo ichi. Ivi ndivyo vikutipasa nkhangono kuti vinthu vikwenda makora. Ise tikuwerera kumanyuma chara tikukhumba bamama banandi bazakimirira pa visola ivyo vizamuchitika mu mwezi wa Seputembala.



BRIGHT KUMWENDA

Vipani vya Malawi Congress Party (MCP) na Democratic Progressive Party (DPP) vyati vivwirenge bamama awo bakachita makola pa visola vyawo vya chisanisani kweni bakatondeka kupereka ndalama izo wupu wa Malawi Electoral Commission (MEC) ukukhumba kuti bazakaphaligzane nawo pa visola vya pa Seputembala 16 chaka chino.

Pa zuba ilo kuzamukuba kusola mrongozi wa charo ichi, bimiriri ba ku Mphala ya Malango kweniso makhansalala.

Apo bakachezganga na mutolamakani ku wayalesi ya Times Brian Banda, mulembi wa MCP ba Richard Chimwendo Banda wakati chipani chawo chivwirenge bamama awo batondeka kufiska kupereka ndalama ku MEC.

“Tazamuperekera mama waliyose uyo watondeka kupereka payekha, kweni wanweka kunjira pa pa visola vyapa Seputembala 16.

“Nanga uli, tikuyowoya pakweru chara chifukwa tikopa kuchiskaso banji abo bangafiska kupereka pabekha,” wadumba Chimwendo Banda.

## Ba MCP, DPP balipirire bamama bakusoberwa ku wupu wa MEC



**Chimwendo Banda:** Towwire bamama abo balije ndalama

Nayo Mary Navicha uyo ni mulala wa banakazi muchipani cha DPP, wakati chipani chawo chanozga ndondomeka yakowira bamana awo bangafiska

chara kupereka ndalama ku MEC.

Waliyose uyo wazamuphalizgana nawo pa visola wakwenera kupereka ndalama ku

MEC.

Uyo wakuphalizgana pa chitengo cha mrongozi wa charo ichi wazamupereka K10 miliyoni apo pa chitengu cha mwimiriri

wa Mphala ya Malango, banalume wa za`mupereka K2.5 miliyoni apo bamama bazamupereka K1.5 miliyoni.

Pa chitengo cha khansalala, banalume bazamupereka K200 000 apo bamama bazamupereka K100 000.

Mawupu gha Oxfam na Women Legal Resource Centre (Wolrec) bakhwaskanapo na MEC kweniso vipani vya kuti vikhizgeko ndalama izo bamama, bawukilano na bakulimala abo bakukhumba kuzaphaligzane nawo pa visola bapereke.

“Tikalomba banyithu ba MEC kuti bakhizgeko ndalama izo bamama bakupereka ndipo bakatipulika,” bakayowoya nthura ba Lingalireni Mihowa, mulala wa wupu wa Oxfam.

Vipani vinandi vya ndyali vikapulika pempho lithu kwakuti, bamama, bawukilano na bakulimala awa bazamuphalizgana nawo pa visola, bakulipa ndalama ichoko kupambana na banalume.



Ba Joyce Banda watola kale makalata

## JB wazamumirira pa chitengo cha pulezidenti

**YAFUMIRA | PEJI 3**

chikulondezga boma la demokalase ilo likupereka nkhangono zakusola barongozi kwa banthu.

“Bimiriri pa visola vya mrongozi wa charo bakusoleka na banthu kwizira mu maungano ghavipani.

“M w a n t h e u r a , bamama bakwenera kupasika mwabi wakuphalizgana na banalume pa visola vya mu vipani na chirato chakuti bazakamirire vipani vyabo pa visola vya mrongozi wa charo,” yalandura nthura nkhwanthi iyi.

Ba Tsitsi bakuti nchakukondweska kuti ungano wa MCP uli kusola bamama babiri kuba bachibiri kwa ba Chakwera.

Balalabalala ba MCP, DPP na UTM, abo bakakana kuzunula mazina ghabo, bakati bakumanya chara banthu abo barongozi babo bazamwimirira nabo pa chisola ichi.

Wapachitengo wa MEC ba Annabel Mtalimanja baromba bimiriri bose kuti bapereke ndalama ku wupu wawo kuti batole makalata.

Banthu abo bakukhumba kuzamirira pa chisola cha mrongozi wakwenera kulipa MEC K10 miliyoni.

“N k h u m a n y i s k a vipani na bimiriri bose kuti wupu wa MEC wasazgirapo mazuba ghakupereka makalata yabo,” bakayowoya nthura ba Mtalimanja.

Banthu bose bakwenera kuzakawezga makalata ghabo ku MEC kwambira pa Julaye 24 mpaka 28.

## WOMEN yakhazikiska manifesito

**BRIGHT KUMWENDA**

Nkhwantha zakuchiska wanangwa wa bamama zikuti manifesito ya bamama ni chilwero cha nkhangono chakusinthira umoyo wawo pa ndyale za charu ichi.

Nkhwantha izi zikapataula makani agha pa chiphikiro cha kukhazikiska manifesito yawo icho wupu wa Women's Manifesto Movement (WOMEN) ukanozga mu musumba wa Lilongwe.

Pamalonje ghawo ku chiphikiro ichi, nkhwanthi ya kuchiska wanangwa wa banakazi ya ku South Africa ba Dr. Naledi Pandor bakarumba WOMEN pakukhazikiska manifesito iyo.

“Manifesito ni dongosolo la vinthu ivyo bamama bakukhumba mu charu chino. Usange mwabazga manifesito ya WOMEN, musangenge kuti bamama bakudokera kuzakaba bimiriri ba Mphala ya

Malango, kuzakaba nduna za boma kweniso kutolapo lwande pa uzengi wa charu,” bakayowoya nthura ba Pandor.

Nkhwantha iyi yikulondezga chomene za umoyo ba Charlotte Maxeze abo bakumanyikwa chomene pa nkhanu zakuvikirira mawanangwa ya bamama.

Ibo bachiska bamama kuti baleke kugongowa apo bakulwera wanangwa wawo.

Ba Pandor mbasambizgi nakuti basebezgapo nge nduna ya boma mu charu cha South Africa kweniso nge thenga la bamama ku wupu wa United Nations.

Mulala wa wupu wa WOLREC ba Maggie Kathewera-Banda bakuti manifesito ya bamama ni dongosolo ilo likudidimiza fundo izo bamama

bakukhumba kuti zichitike kuti umoyo wawo wa ndyale na uzengi usinthe.

Mulala wa wupu wa Oxfam ba Lingalireni Mihowa bakati manifesito yakwamba

yikalembeka mu chilimika cha 2018 nakuyikhazikiska mu 2019.

“Taghanaghana kuti nchiweme kuyikhazikiskaso chifukwa vinthu vinandi vyasinthira mu charu ichi na vyalo vya kuwalo,” bakayowoya nthura ba Mihowa.

Manifesito iyo yikupatawula vya mawanangwa ya bamama yakuchita ndyale, kusanga katundu, malo, kutebeta milimo

mwakuyana na banalume, na vinyake ivyo WOMEN yikukhumba kuti barongozi ba vipani vya ndyale bavisande pa nyengo iyo visola vya pa 16 Seputembala vyaneng'enera.

“T i k u k h u m b a barongozi ba ndyale na vipani vyabo babike fundo za bamama mu manifesito zawo nakutiphilira makola umo bazamukuzifikira.

“Tikukhumbaso kuti chakulata cha bamama chimanyikwe na waliyose. Pawumaliro wa vyose, tikukhumba bamama batolengepo lwande pa uzengi ba vigaba vyabo,” bakalangula nthura ba Kathewera-Banda.

Mawupu ya Oxfam, WOLREC, UN na yanyake ndiyo yapanga wupu wa WOMEN.

**Kathewera Banda:** Bandyale wayilabiske makora



# Baukirano wakukhumba maudindo

JACOB NANKHONYA

**M**rongozgi wa wupu wa Youth and Society ba Charles Kajoloweka badidimizgapo chomene kukhumbikwa kwa malango yakuchichiza boma kuti lipereke maudindo ghanyake ghakulughakulu kwa bawukilano.

Iwo bayowoya ivyi pachitatu mu musumba wa Lilongwe uko baukirano bakakhazikiskanga fundo zabo na chirato chakuti zidangilire barongozgi ba vipani vya ndyali apo bakunozga manifesto yabo ya visola vya pa 16 Seputembala.

Ba Kajoloweka bakati malango gha charo ichi ghakuvikilira wanangwa wa bamama na banthu baulumali kweni ghakupataula makola yayi za mawanangwa ya baukirano.

“Kwasono pano tilije malango, mwachiyerezgero, dango lakuchiska boma kuti pa maudindo 100 ghalighose 30 ghalutenge kwa baukirano.

“Fundo za baukirano ndizo mrongozgi wa charo ichi ugho timusolenge pa 16 Seputembala



Baukirano, mulala wa makhoti, nduna ya vya chuma na Sipika kulongola manifesto ya waukirano

wazamulondezga pakusola nduna kweniso balalabalala banyake mu boma lake,” ibo bayowoya nthaura.

Ibo bakatiso wupu wake ulondezgenge fundo zake pa vidumbirano na balongozgi ba ndyale abo bakukhumba kuti baukirano bazakabasole.

Pakusazgirapo, mulala wa

wupu wa United Nations mu charo ichi, ba Rebecca Ada Donto bakuti kupereka nkhangono kwa baukirano nkhwakuzirwa pa kutolera unandi wawo.

“Nkhumano iyi yikuzunulapo za unandi wa baukirano pera yayi, yikuzunulaso za kunweka

na wanangwa wawo,” bakadinikapo chomene apa.

Ba Ada Donto bakati baukirano mbarongozgi ba machelo pera yayi, kweni ba mwahuno.

“Baukirano mbakunweka kutebeta milimo yinandi yakukwezga charo ichi,” bakasazgirapo ba Ada Donto.

Ba Mwandida Theu, yumoza mwa balala ku Youth Decide Campaign wakaromba barongozgi ba ndyale kuti bamanye ivyo baukirano bakukhumba mu charo ichi na kuvisazga mu manifesto ya vipani vyawo.

“Pa banthu 100 baliwose wa mu charo ichi, 60 mbaukirano.

Mwakusazgirapo, kawundula wa visola vya chilimika ichi wakuoneska kuti pa banthu 100 baliwose abo mbakulembeska, 63 mbaukirano.

“Kwantheura, baukirano bakwenera kutolapo lwande likulu mu vipani, mu unduna kweniso mawupu gha boma kuti charo ichi chirute panthazi,” bayowoya nthaura ba Theu.

Pakubikapo zero, Sipika wa Mphara ya Malango ba Catherine Gotani-Hara bakati baukirano bachichizge kulwa nkondo ya wanangwa wawo.

“Lekani kuvuka panji kuwela nyuma apo mukupenja wanangwa winu. Kumbuskani bimiriri ba ku Mphala ya Malango ivyo mukukhumba para basoleka na kuruta ku Mphala ya Malango.

“Nayowoya nthena chifukwa chakuti palije mwimiliri na yumoza uyo wakadumbapo za bawukilano panyengo iyo tikajalanga mphala yithu. Ndicho ntchifukwa tikaleka kudumbapo kanthu vya bawukilano,” bayowoya nthaura ba Gotani-Hara.

## Baukirano bajintha mtima no kugongowa

MARTIN GERA JNR NA BRIGHT KUMWENDA

**B a u k i r a n o**, kusazgirapo banji awo bazamuphalizgana nawo pa visola vya ukhansalala na bimiliri ku Mphala ya Malango pa 16 Seputembala chaka chino, maso ghawo ghali panthazi, nakuti bakuwela nyuma chara.

Ba Eliza John awo bazamuphalizgana pa chitengo cha ukhansalala ku Machinga Mbenechela batangwanika kuchitiska maungano mu chigaba chawo na chirato chakuti banthu bamanye fundo zabo.

“Maloto ghane nkukhumba kwiza na maji ghawemi, masambiro, ulimi wa mazuba ghano kweniso kukwezga umoyo mu chigaba chithu,” bakapataula nthaura ba John.

Ba Hastings Mapundi aboo bazamuphalizgana nga mwimiriri wa Mphala ya Malango chigaba cha



**Chambo:** Baukirano bakhorwa na fundu zane

pakati m'boma la Nsanje nabo maso ghali panthazi. “Masogane ghali panthazi. Nkhuchenuka yayi chifukwa nachikhumbisiska chitengo ichi,” bakalongosola ba Mapundi.

Iwo bakukhumba kumazga ukavu na njala mu chigaba chabo.

Maloto ghabo ghakupambana yayi na ya ba Benjamin Kachikho

Simeon abo bakukhumba kuzaphalizgana pa chitengu cha mwimiriri wa ku Mphala ya Malango mu chigaba cha Thyolo Thava.

“Nanozgeka kuzamazga masuzgo agho banthu bakwithu bakukumana nayo. Nizamuchiska utebeti wa mawoko, malonda ghachokoghachoko, ulimi wa kuthilira na maluso ghanandi kwa bawukilano. Ba Aalon Chambo



**Kunje:** Nkwiza na vitukuko vinandi

nawo bakuvuka chala, bakudokera chitengo cha mwimiriri wa Mphala ya Malango cha muchigaba cha pakati cha mu boma la Mulanje.

“Usange natola chitengo, nizamupereka nkhangono kwa banthu, kwiziska vitukuko vinandi na kuchita vinthu pakweru,” ibo bakalongosola.

Ba Chambo bakuti “bawukilano banandi

bachipokelera nakuti bali panyuma ghabo pakuti bose bali na maloto ghakuyana”.

Ibo bakuti banthu ba mu chigaba chabo bakukhumba chitukuko cha masambiro, vipatala, maji ghawemi na misewu yiwemi.

“Ukavu wakula chomene mu chigaba chithu kwakuti nanozgeka kuwumazga,” balangula nthaura ba Chambe.

Ba Aida Adam Kunje, abo bakuzakaphalizgana pa ukhansalala ku Machinga Sankhwi, baromba banthu kuti balabiske vitukuko ivyo iwo bachita kale.

“Banthu mbakaboni kuti napanga vitukuko vya mabuliji, mijigo, magesi na vinyake vinandi,” bakadidimizga bamama aba.

Nangawuli vili mwaheura, bawukilano baromba wupu wa Oxfam na Women Legal Resource Centre (WOLREC) kuti bawavwire na katundu kuti bapereke ku banthu kuti

bazakabasole.

Oxfam na WOLREC bakuchiska bawukilano, bamama na bakulimala kuti bakapharizgane nawo pa visola vyapa 16 Seputembala.

Mulala wa Oxfam, Lingalireni Mihowa wakapangana kuti wazamubapa katundu wakubapa banthu pala balembeleska mu kawundula wa visola ku wupu wa Malawi Electoral Commission (MEC).

Ba Mphatso Kapito, bakuphalizgana pa chitengu cha mwimiriri waku Mphala ya Malango kumwera kumafumiro ya dazi m'boma la Machinga bawonga Oxfam na WOLREC chifukwa cha utebeti wawo.

“Oxfam na WOLREC bakutebeta milimo yiwemi chifukwa bakutikholweska mtima, kweniso kutisambizga umo tingahongera wumba muviga vithu,” iwo bakayowoya.

# Ulendo wangunowa—ba Kondowe

LOVEMORE KHOMO

Mwimiliri wa Mphala ya Malango wa ku mlenji kwa boma la Nkhotakota ba Overstone Kondowe bati ulendo wawo mu ndyale wanguba wakunowa nakuti bachiska banthu baKulimala kuti bazaphalizgane nawo pa visola vyapa 16 Seputembala.

Ibo baphalira nyuzipepala ya 2025 *Ndi Ifeyo* kuti nyengo iyo bakhala mu Mphala ya Malango bachontheke kuti pa ndyale paliye mphambano pakati pa munthu wakulimala na wakulunga.

Ba Kondowe mbakwamba nga munthu wa chialubino kusoleka na kuba mwimiliri wa ku Mphala ya Malango m'charo ichi.

Doda ili likasoleka mu vilimika ivyo banthu ba chialubino bakakomekanga kwizira mu kudumulika vigaba.

“Masuzgo ghara ghakaniwezgera munyuma yayi kweni ghakanipa nkhangono zakuti niphalizgane nawo ngati mwimiliri wa Mphala ya Malango.

“Ku mphala kula nabelebeta chomene za wanangwa wa banthu bakulimala chomene pa masuzgo agho bakukumana nawo, kuzizipizga kwawo kweniso, ivyo boma lingachita pakumazga masuzgo ghawo,” bakayowoya nthaura ba Kondowe.

Ibo bakalongosolaso kuti kusoleka kwawo ni ukaboni kuti banthu bakulimala bakufiska chilichose nge munthu wakulunga.

Ba Kondowe bakuti wene na wene wawo na bimiliri ku Mphala ya Malango mu chipani cha Malawi Congress Party (MCP) kweniso vinyake vya kususka boma, nguweni waka.

“Bimiliri banyane bakunitola ngati munyawo . Tikuchezganga kwambula kugegana panji kuyuyulika,” ndimo bakadumbira ba Kondowe.

Ibo bakasoleka mu chilimika cha 2021 pa nyengo iyo mwimiliri wa Mphala ya Malango mu chigaba chawo, ba Martha Lunji, bakapotera.

“Vitukuko ivyo ba Lunji bakaleka nkharutizga mpaka kumalizga pakuti ni vya kuzirwa mu chigaba chithu.

“Banthu ba ku Bua mpaka Dwangwa bakabavye maji ghawemi kuuskako pa Liwalazi Mission pera, kweni kwasono maji ghawemi ghali palipose.

“Mu chigaba chane nkchuchiska ulimi na ulovi pakuti banthu banandi mbalovi na balimi,” wakadidimizga

mwimiriri uyu.

Mu nyengo yawo ngati mwimiliri wa Mphala ya Malango ba Kondowe bakati basazgirapo malo yakuguliskira viwombero vya ulimi vya kukhira mtengo, bazengaso

mphala ya kulungula banthu na musika ku Chisenjere na Chamlame.

Ibo balomba banthu mu chigaba chabo kuti



**Kondowe:** Paliye mphambano pakati pithu

bazakabasoleso pakuti bakukolelerana na boma pa kwiziska makampani kuzatebeta milimo ya migodi mu charo ichi.

“Mwakovwirana na bimiliri ku Mphala ya Malango banyane, tikukhumba mphala iyi yikazomerezge dango la ulimi wa mijuba na malonda gha shuga chifukwa banthu mu chigaba chane bakulima chomene mijuba.

“Usange dango ili lazomerezgeka, banthu banandi bazamusambazga. Kwambira kale, ulimi wa chamba ukuchita makola mu charo chino. Ntheura, nazamuyezgeska kuchiskako pa nkhanu iyi,” ndimo bakadumbira ba Kondowe.

Mwakusazgirako ulonje, mulala wa wupu wa Association of Persons with Albinism in Malawi (APAM) ba Maynard Zachariah barumba ba Kondowe pakwimilira makola banthu mu chigaba chabo kweniso banthu bakulimala mu charo ichi.

“Ba Kondowe bayimirira makola banthu mu chigaba chabo pera yayi kweni bamiriraso banthu bakulimala wose mu charo ichi.

“Nirumbeso banthu mu chigaba cha kumpoto kumlenji kwa boma la Nkhotakota pakuti bakanipa mwabi wakuti nibamiririre,” ibo bakayowoya nthaura.

Ba Zachariah bakati ba Kondowe bali kulungola

kuti munthu wakulimala wangatebeta ngati munthu wakulunga.

Ibo bachiskaso banthu bakulimala na bimiliri mu vitengo vya visola kuti baleke kugongowa kuzaphalizgana nawo pa visola vyapa 16 Seputembala.

Banthu bakulimala abo bazamuphalizgana nawo pa visola vyapa 16 Seputembala bakuti banweka chifukwa cha ba Kondowe, Clement Terence Chiwaya, Susan Chitimbe na ba George Claver.

Ba Emelia Chapaheya awo bazamuphalizgana pa chitengu cha mwimiliri wa Mphala ya Malango kumwera chakumlenji kwa boma la Mulanje, bapataula kuti ndyali za ba Chiwaya, Kondowe, Chitimbe na ba Claver zikabakhung'uska kuti nawo bangakwaniska.

“Banyithu bakamirira mu vigaba vyawo ndipo bakachita makola chomene. Ichi ndicho chikunitutuzga,” bakalongosola kwambura kukaika kuti bazamuchita makora pa visola ivi.

Ba Umali Sungani, ubo wazamuphalizgana nge khansalala mu chigaba cha Sankhwi na ba Mphamvu Kalima ubo wazamuphalizgana ngei khansalala wa chigaba cha Nsanje Nyamazere bakati ndyale za ba Chiwaya na ba Kondowe zikuwachonthe chomene.

“Banangwa aba bakunilimbiska mtima,” bakapataula ba Sungani.

## Bachiska bakulimala kutolapo lwande pa ndyale

LOVEMORE KHOMO NA BRIGHT KUMWENDA

Mungopanga yayi, mungabanga na ophwayi, kuwerera nyuma yayi!

Agha ni mazgo gha kuchiska gha mawupu gha Federation of Disability Organisations in Malawi (FEDOMA) na Association of Persons with Albinism (APAM) bapereka ku banthu bakulimala abo bakukhumba kuzakaphalizgana pa visola vya pa 16 Seputembala mu charo chino.

Mulala wa FEDOMA ba

Simon Munde bapempha vipani vya ndyale kuti vilondeze fundo za chitukuko za 2030 izo zikupereka mwabi kwa waliyose, kusazgirapo banthu bakulimala, kutolapo lwande pa nkhanu za chitukuko, kweniso ndale.

Ibo bati banthu bakulimala nawo bali na upangiri kuchita makora pa ndyale na kurutiska panthazi vigaba vyabo nge munthu waliyose.

“Mu vyaka vyajumpha, tikaba na ba Clement Chiwaya abo bakaba mwimiriri wakulimala ku

chigaba cha pakati m'boma la Mangochi.

Mwimiriri uyu wakachita makora mpaka banthu bakamusolapo kabiri nge mwimiliri wa Mphala ya Malango.

“Mu vilimika ivyo vyajumpha, banthu bakulimala balongora kuti ndyale zawo ni za kurutiska panthazi chitukuko nakuti bakutemwaso banthu.

“Sonosono apa, ba Overstone Kondowe bakugwira nchito yapachanya nge mwimiriri ku chigaba cha kumpoto cha kumlenji kwa boma la Nkhotakota,” bayowoya

ntheula ba Munde.

Ibo bati mbakukondwa chomene na banthu banandi bakulimala abo bakukhumba kuzakwimirira pa visola vya pa 16 Seputembala.

Nagho mulala wa APAM, ba Maynard Zachariah, baphalira banthu baulumali kuti baleke kugongowa panji kopa kuzakayimirira mu vigaba vyabo.

Ba Emilia Chapaheya, abo bakukhumba kuzakaphalizgana nge mwimiriri wa chigaba chakumwera cha kumafumiro ya dazi ya m'boma la Mulanje,

ba Umali Sungani abo bazamwimira nge khansala mu chigaba cha Sankhwi na ba Mphamvu Kalima abo bazamwimira nge khansala mu chigaba cha Nyamadzele mu boma la Nsanje bawonga mawupu ya FEDOMA na APAM chifukwa chakubakwimiska.

“Mazgu agho FEDOMA ghayowoya ghanipa nkhangono kuti nirutirizge mpaka ni zakaba mwimiliri wa Mphala ya Malango,” bayowoya nthaura ba Chapaheya.

Ibo bakuti balije maghanoghano

ghakuwerera kumanyuma nakuti bakugomezga kuti bachitenge makora pa chisola ichi.

“Nkhukayika yayi kuti nichitenge makora,” ibo bayowoya nthaura.

Ba Sungani na ba Kalima bakuti ba Kondowe, Chiwaya, Susan Chitimbe na George Claver ndibo bakubapa nkhangono kuti nabo bamiririre vigaba vyabo.

“Banyithu bakachita makora, ine nane nkugomezga kuti nichitenge makora,” bayowoya nthaura ba Kalima.

# Babika ndondomeko zakukanizga bandyale kupereka vimbundi

JOSEPH MWALE NA  
BRIGHT KUMWENDA

**M**ulala wa muofesi yakuona umo vipani vya ndyale vikutebetera, Kizito Tenthani wati wakumanenge na banthu bakuchita ndyali kweniso kupangiska maungano agho chirato chake bina Malawi za uheni wa kupoka vimbundi kufumira kwa banthu ba ndyale.

Ofesi ya ba Kizito Tenthani yikatondekanga kwendeska dango la vipani chifukwa yikabavya ndondomeka zakwenelera.

Ndipo ndondomeka izi zikadidimizgika pa Meyi 23 apo kukati kwakhala mwezi umoza pela kuti wupu wa Malawi Electoral Commission (MEC) wapereke nyengo iyo bandyale bahongele banthu pakukavota.

Ba Kizito wakati ndondomeka izi zalongola kuti boma lawikapo lwande pa kumazga uchitiro wakupa banthu ndalama panji katundu mu ndyali.

“Tikukumana na barongozgi ba ndyale kuti bamanye vya kuzirwa kwa ndondomeka izi,’ b bakalangula nthaura ba



**Tenthani:** Tikukhumba banthu bamanye za ndondomeko izi

Kizito.

Dango la vipani likuzomerezga kuperekeka kwa vyakuvwala vya chipani, chakurya kweniso ndalama ya mendero kwa banthu ba mchipani pera.

Kweni, dango ili likuzomerezga yayi kupa

b anthu ndalama panji katundu na chirato chakuti wazakabasole.

Mulala wa bungwe la National Initiative for Civic Education (Nice) Trust ba Gray Kalindekafu waromba ba Tenthani kuti ndondomeka za ndyali zitebete kwambula

kuona chisyo cha munthu.

Pakusazgirapo pa makani agha, mulala wa bamama mu chipani cha DPP ba Mary Navicha bakuti mbakusangwa pakuti ndondomeka zayambako kuteweta milimo yake.

“Ndine wakukondwa pakuti bamama, bawukilano kweniso bakulimala bakatondekanga chifukwa chakubav ya ndalama zakupa banthu,” bakapataula nthaura ba Navicha.

Muyowoyeli wa chipani cha Alliance for Democracy (Aford) ba Linda Limbe bakuti ndondomeka izi zivwirenge kumazga masuzgo agho banthu ba ndyali wakusangana nawo.

Ba Juliana Pasani ba ku Mulanje, Joseph Zakariah ku Dedza, Silvester Njikho ku Nsanje na ba Ganizani Mhango ba ku Rumphu bakati suzgo mbanthu ba ndyale chifukwa bakukhumba kusebezeka waka banthu mu nyengo ya visola.

“Banthu ba ndyali bakuchimbilira ku Bulantaya panji Lilongwe pala bawina visola. Sono nase tilyepo apo tabavwira kusambazga,” bakayowoya nthaura ba

Pasani.

Mawupu gha Oxfam na Women Legal Resource Centre (Wolrec) ghayezeska kulimbana na nkharo yakupa banthu ndalama panji katundu chifukwa vikuchitiska kuti bamama baleke kusanga chitengo pa visola.

“Ndyale za nthaura ndizo zikutondeska mlimo wakuona kuti paleke kuwa mphambano pakati pa banalume na banakazi. Para tasandasanda, ivi vikuwoneska kuti ndyale za nthaura zikutemwera banalume pera pakuti ndiwo bali na ndalama pakuyezgerana na bamama, baukirano na banthu bakulimala,” bakadumba mulala ku Oxfam ba Lingalireni Mihowa.

Ba Emelia Chapaheya, abo bakukhumna kuzakaphalazgana pa chitengo cha mwimiliri wa Mphala ya Malango kumwera kumafumiro ya dazi m'boma la Mulanje, wakhozgerana na mawupu gha Oxfam na Wolrec.

“Mbunenesko ndalama zikusuzga,” bayowoya nthaura ba Chapeheya.



**Navicha:** Vivulupi na misinjira takana

## Vipani vyakana vivulupi

BRIGHT KUMWENDA

Barongozgi ba ndyale bapangana kumaza vivulupi ivyo vikuba mu maungano ya ndyale pa nyengo ya visola kweniso pa kupharazga visola.

Balongozgi aba bakapangana pa ungano uwo wupu ba Public Affairs Committee (PAC) bakaba nabo munyuma umu mu msumba wa Blantyre.

Pa kukumana uku, muyowoyeli wa chipani cha Malawi Congress Party (MCP), ba Jessie Kabwila, bakachenya vivulupi ivyo vikuchitiska chifukwa cha ndyale.

“Vivulupi ni viheni kwambura kutolera kuti chipani icho chambiska chili m'boma panji nchakusuka,” ibo bakayowoya nthaura.

A Mary Navicha, mwimiliri wa chipani cha Democratic Progressive Party (DPP), bakati chipani chabo chieyengege kukanizga vivulupi vya pa ndyale chifukwa vikutimbanizga mulimo wakuchiska bamama kutolapo lwandi pa ndyale.

“Banakazi banandi bakopa kupanga nabo ndyali chifukwa cha vivulupi. Nthaura nkupempha bapolisi kuti bachitepo kanthu kumazga mchitiro uwu,” ba Navicha bakayowoya nthaura.

Balembi ba chipani cha MCP, ba Richard Chimwendo Banda, na ba DPP, ba Peter Mukhito, pa kukumana kwawo bakhala bakuchenya mchitiro uwu.

Mlembi wa Alliance for Democracy (AFORD), ba Linda Limbe, bakati chipani chawo chikugomezga kuti vivulupi vikutimbanizga mutende wa m'charo.

# Baromba vipani kusunga phangano

BRIGHT KUMWENDA

Bamama, baukirano na banthu bakulimala abo bazamuphalizgana pa visola vyapa 16 Seputembala baromba vipani vya ndyale kuti vileke kuswa phangano ilo vikapanga na mawupu gha Oxfam na Women Legal Resource Centre (WOLREC) pa mphala ya fumu Mkanda m'boma la Mulanje chilimika chamala.

Pa 24 Julayi, vipani vya ndyale vikadumbirana vya kuchiska bamama, baukirano na bakulimala kutolapo lwande pa ndyali nakubapa mwabi wakuchita nawo visola vya chisanisani.

Ba Hastings Mapundi, awo bazamuphalizgana nawo pa chitengu cha mwimiliri wa Mphala ya Malango pakati pa boma la Nsanje kweniso ba Aida Adam Kunje awo bazaphalizgana nge khansalala mu chigaba cha Machinga Sankhwi,

baromba banthu ba ndyale kuti basunge phangano ilo.

Pakwandulapo pa makani agha, mulembi mu chipani cha Malawi Congress Party (MCP) ba Richard Chimwendo Banda mu pulogalamu ya Mulimba, bakati chipani chabo chikulondezga phangano nakutiso sono apa bali kukhizgako ndalama izo bamama baperekenge kuti bapharizgane nawo pa chisola cha chisanisani.

“Mrongozgi wa charo ichi ba Lazarus Chakwera bakulondezga ndondomeka gha boma ighe ghikulangula kuti pa vitengo 100, vitengo 40 virutenge kwa bamama kuti badada batolenge 60.

“MCP yikuchita ivi kwambira pakusola zinduna kweniso bamuvitengo vinyake mu chipani.

“MCP ni chipani chekha icho chili na bamama banandi awo mbakusendelera kwa



Balalabalala ba ndyale kusayina phangano na Oxfam na WOLREC

mrongozgi wake ba Chakwera.

“Ba Abida Mia mbachibiri kwa ba Chakwera mu chigaba chakumwera apo ba Catherine Gotani Hara mbachibiri babo mu chigaba cha kumpoto,” bali kwandura nthaura ba Chimwendo Banda.

Mlembi wa chipani cha

Alliance for Democracy bamama Linda Limbe wakuti bakulondezga phangano mwakuti bakasankha komiti yikulu ya kwendeska milimo ya chipani umo banthu bakujumpha 40 pa 100 mba mama.

Mrongozgi wa bamama m'chipani cha Democratic Progressive Party (DPP)

ba Mary Navicha bakuti chipani icho chikurutiska panthazi umoyo wa bamama, bawukilano na banthu bakulimala pa ndyale.

Walesi yakanema ya Times ndiyo yikuphalazga pulogalamu ya Mulimba na wowwiri wa kufumira ku mawupu gha Oxfam na WOLREC.